

I. DISPOSICIÓN XERAIS

MINISTERIO DE INDUSTRIA, TURISMO E COMERCIO

10668 *Orde ITC/1721/2009, do 26 de xuño, pola que se regula, para o ano 2007, a minoración da retribución da actividade de produción de enerxía eléctrica no importe equivalente ao valor dos dereitos de emisión de gases de efecto invernadoiro asignados gratuitamente.*

O Real decreto lei 3/2006, do 24 de febreiro, polo que se modifica o mecanismo de casación das ofertas de venda e adquisición de enerxía presentadas simultaneamente ao mercado diario e intradiario de produción por suxeitos do sector eléctrico pertencentes ao mesmo grupo empresarial, establece no seu artigo dous que a retribución da actividade de produción de enerxía eléctrica se minorará polo importe equivalente ao valor dos dereitos de emisión de gases de efecto invernadoiro asignados gratuitamente aos produtores de enerxía eléctrica no Plan Nacional de Asignación 2005-2007 durante os períodos que correspondan.

O número 3 do artigo dous do Real decreto lei 3/2006, do 24 de febreiro, habilita o ministro de Industria, Turismo e Comercio para o desenvolvemento regulamentario do mesmo artigo, o cal foi levado a cabo, para o ano 2006, mediante a Orde ITC/3315/2007, do 15 de novembro.

Esta disposición estende a aplicación da metodoloxía da Orde ITC/3315/2007, do 15 de novembro, ao período comprendido entre o 1 de xaneiro de 2007 e o 31 de decembro de 2007.

De conformidade co disposto na disposición adicional décimo primeira, punto terceiro.1, funcións segunda e cuarta da Lei 34/1998, do 7 de outubro, do sector de hidrocarburos, e no Real decreto 1339/1999, do 31 de xullo, polo que se aproba o Regulamento da Comisión Nacional de Enerxía, esta emitíu o seu preceptivo informe 1/2009, do 29 de xaneiro de 2009.

Por outra parte, para a elaboración da orde realizouse o preceptivo trámite de audiencia aos interesados.

O texto desta orde foi sometido a informe da Comisión Delegada do Goberno para Asuntos Económicos na súa reunión do día 25 de xuño de 2009.

Na súa virtude, de acordo co Consello de Estado, dispoño:

Artigo 1. *Obxecto.*

Constitúe o obxecto desta orde, en desenvolvemento do artigo dous.3 do Real decreto lei 3/2006, do 24 de febreiro, a regulación da minoración, para o ano 2007, da retribución da actividade de produción de enerxía eléctrica por un importe equivalente ao valor dos dereitos de emisión de dióxido de carbono asignados gratuitamente a esta actividade.

Artigo 2. *Ámbito subxectivo de aplicación.*

1. O disposto nesta orde será de aplicación aos titulares de cada unha das instalacións de produción de enerxía eléctrica en réxime ordinario, calquera que sexa a súa tecnoloxía, no territorio peninsular.

2. Non están suxeitas a esta disposición as instalacións de xeración de enerxía eléctrica en réxime especial nin as instalacións a que fai referencia a disposición adicional sexta do Real decreto 661/2007, do 25 de maio, polo que se regula a actividade de produción de enerxía eléctrica en réxime especial. Tampouco están suxeitas as instalacións dos territorios insulares e extrapeninsulares.

Artigo 3. *Ámbito obxectivo de aplicación.*

A minoración afectará a retribución das instalacións de produción de enerxía eléctrica a que fai referencia o artigo 2 desta orde, con independencia da modalidade de contratación utilizada.

Artigo 4. *Minoración correspondente ao ano 2007.*

1. Os titulares definidos no artigo 2.1 realizarán, na conta en réxime de depósito da Comisión Nacional de Enerxía a que se refire a disposición adicional desta orde, un pagamento correspondente ao período comprendido entre o 1 de xaneiro e o 31 de decembro do ano 2007, ambos inclusive, con obxecto de minorar a retribución da actividade de produción de enerxía eléctrica por un importe equivalente ao valor dos dereitos de emisión de dióxido de carbono asignados gratuitamente e correspondentes ao indicado período.

2. A contía da minoración será equivalente ao sobreingreso obtido no mercado pola internalización do valor destes dereitos, nos termos establecidos nesta orde.

Artigo 5. *Cálculo da contía do pagamento.*

O pagamento correspondente a cada instalación de xeración de enerxía eléctrica a que fan referencia os artigos 2.1 e 4 desta orde calcularase segundo as fórmulas seguintes:

a) Instalacións non asignatarias de dereitos de emisión no Plan Nacional de Asignación 2005-2007:

$$Y_i^T = Q_i^T \times FE_m \times P^{CO_2T}$$

onde:

Y_i^T é o pagamento, en euros, correspondente á instalación i-ésima non asignataria de dereitos de emisión para o período T, comprendido entre o 1 de xaneiro e o 31 de decembro do ano 2007, ambos os dous incluídos.

Q_i^T é a cantidade total de enerxía eléctrica producida pola instalación i-ésima durante o período T, comprendido entre o 1 de xaneiro e o 31 de decembro do ano 2007. Para os efectos desta orde, computarase a enerxía medida en barras de central. Para aquelas instalacións cuxa entrada en operación comercial, entendida esta como a alta definitiva no rexistro de instalacións de réxime ordinario a que se refire o artigo 171 do Real decreto 1955/2000, do 1 de decembro, polo que se regulan as actividades de transporte, distribución, comercialización, fornecemento e procedementos de autorización de instalacións de enerxía eléctrica, sexa posterior ao 1 de xaneiro de 2007 será a cantidade total de enerxía eléctrica producida durante o período transcorrido entre a data de inscrición no rexistro e o 31 de decembro.

No caso de instalacións de bombeo, para o cálculo da detracción considerarase a produción neta do período T. Se a produción neta resulta negativa, o valor de Q_i^T será cero.

P^{CO_2T} é o prezo medio da tonelada equivalente de CO_2 no período T, comprendido entre o 1 de xaneiro e o 31 de decembro do ano 2007, ambos os dous incluídos, medido en euros por tonelada equivalente de CO_2 . Calcularase como a media do prezo ao contado de cada un dos días deste período da tonelada equivalente de CO_2 no mercado de Powernext S.A. (BlueNext Spot EUA 05-07). Os días de negociación considerarase o prezo de cerramento do mercado, e o resto dos días considerarase o prezo de cerramento do último día de negociación anterior. Para as instalacións cuxa entrada en operación comercial, entendida esta como a alta definitiva no rexistro de instalacións de réxime ordinario a que se refire o artigo 171 do Real decreto 1955/2000, do 1 de decembro, sexa posterior ao 1 de xaneiro de 2007, considerarase só os días do período a partir da dita data de inscrición.

FE_m é o factor de emisión dunha instalación de ciclo combinado de gas natural, en toneladas equivalentes de CO_2 por megavatio hora. FE_m adoptará o valor de 0,365 ton CO_2 /MWh.

b) Instalacións asignatarias de dereitos de emisión no Plan Nacional de Asignación 2005-2007:

$$X_i^T = \frac{d}{365} \times DA_i^{2007} \times P^{CO_2T} \times \frac{FE_m}{FE_i}$$

onde:

X_i^T é o pagamento, en euros, correspondente á instalación i-ésima asignataria de dereitos de emisión para o período T, comprendido entre o 1 de xaneiro e o 31 de

decembro do ano 2007, ambos os dous incluídos. Para cada instalación asignataria, o límite máximo para o valor de X_i^T será o que resulte de aplicar a esta instalación a fórmula de detracción das tecnoloxías non asignatarias do artigo 5, alínea a).

d é o número de días de operación comercial da instalación i no período T . Para aquelas instalacións cuxa entrada en operación comercial, entendida esta como a alta definitiva no rexistro de instalacións de réxime ordinario a que se refire o artigo 171 do Real decreto 1955/2000, do 1 de decembro, sexa anterior ao 1 de xaneiro de 2007, d tomará o valor de 365. Para as instalacións con entrada en operación posterior a esa data, o valor de d calcularase como o número de días transcorridos entre a data de inscrición no rexistro e o 31 de decembro.

DA_i^{2007} é a cantidade de dereitos asignados gratuitamente no Plan Nacional de Asignación 2005-2007 á instalación i -ésima para o ano 2007, en toneladas equivalentes de CO_2 .

FE_i é o factor de emisión da instalación i -ésima, en toneladas equivalentes de CO_2 por megavatio hora.

FE_m e P^{CO_2T} son as variables definidas no punto anterior.

Disposición adicional única. *Notificación e pagamento*

1. Habilítase a Comisión Nacional de Enerxía para solicitar a información necesaria para dar cumprimento ás obrigas impostas por esta orde.

2. Antes de que transcorran dous meses desde a entrada en vigor desta orde, a Comisión Nacional de Enerxía notificará:

a) Aos titulares de instalacións e á Secretaría de Estado de Enerxía os importes resultantes da minoración da retribución, detallando os cálculos realizados e a conta en réxime de depósito onde se farán efectivos os pagamentos.

b) Á Secretaría de Estado de Enerxía os importes resultantes da minoración da retribución, detallando os cálculos realizados e a contía final do déficit de ingresos do sistema eléctrico do ano 2007.

3. As empresas titulares das instalacións a que se refire o artigo 2 deberán realizar os ingresos dos importes resultantes da minoración na conta que para estes efectos lles notificase a Comisión Nacional de Enerxía conforme o punto anterior, dispoñendo, desde a recepción da notificación da Comisión Nacional de Enerxía dun prazo de dous meses para a realización deste ingreso. Estes pagamentos terán a consideración de ingresos liquidables do sistema, de conformidade co establecido no Real decreto 871/2007, do 29 de xuño, polo que se axustan as tarifas eléctricas a partir do 1 de xullo de 2007.

4. En virtude do número 2 da disposición adicional vixésimo primeira da Lei 54/1997, do 27 de novembro, do sector eléctrico, o importe neto correspondente á minoración dedicarase a reducir o déficit ex ante de ingresos do sistema eléctrico no ano 2007 e exercicios seguintes.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 26 de xuño de 2009.—O ministro de Industria, Turismo e Comercio, Miguel Sebastián Gascón.